

## REGIONAL NEWS BULLETIN

## HEADLINES (MORNING)

1. Kum 2026-27 Financial Year-a Mizoram sum ruahman chu cheng vaibelchhe 17,076 leh nuai 92 a ni.
2. Chief Minister Pu Lalduhoman ZPM kaihrui sorkar ah Pension sing 2, sang 9, 598 an chingfel tawh a, Pension chuan Mizoram sorkar budget zaa 14.66 a ei hek pha a ti.
3. FCI Mizoram State Consultative Chairman Pu K. Vanlalvena'n Mizoram sorkar in mipuite hnena buhfai a sem tur buhfai FCI ami vek ni thei se a tih thu a sawi.
4. Mamit-a Sampoonata Abhiyan 2.0 hmalakna kal zel thlir hona Niti Aayog official te nen nimin khan Mamit DC Conference Hall-ah neih a ni.

&lt;&gt;&lt;&gt;&lt;&gt;

## ASSEMBLY : BUDGET

Finance changtu Chief Minister Pu Lalduhoma'n kum 2026-27 Financial Year-a Mizoram sum ruahman cheng vaibelchhe 17,076 leh nuai 92 nimin khan Assembly House ah a pharh.

Kum kal lai 2025-26 budget aiin kumin budget hi cheng vaibelchhe 3057 nuai 8 in a tam zawk a, a punna hi za zela 14.94 a ni a, Budget Estimate 2024-25 zinga cheng vaibelchhe 15,621 leh nuai 48 chu house a pawm ngai a ni.

Pu Lalduhoma hian kumin Financial Year kal laia sum hman ruahman belhna Supplementary Demands for Grants 2025-2026 cheng vaibelchhe 3724 leh nuai 25 chu a pharh nghal bawk a. Sorkar inrelbawlina senso, sorkar hnathawk hlawn leh pension bakah hmasawna thawhna tur atana sum hman tur ruahman (revenue expenditure) hi cheng vaibelchhe 17,127 leh nuai 30 a ni a. Budget pumpui atanga chhutun za zela 82.53 a ni. Mipui hmasawna atana sum ruahman (capital expenditure) atan cheng vaibelchhe 2658 leh nuai 56 dah a ni a, hei hi sum ruahman zawng zawng atanga chhutun za zela 17.46 a ni.

Chief Minister chuan sawrkar laipui hmahlir Viksit Bharat tih hlawnlinna kawnga a tam thei ang ber thawh ve an duh a ti a, kum 2047 ah India ram pumpui dehchhuah GSDP atanga zaa 1 chu state atanga thawhchhuah ve an tum tih sawiin thil thar siamna leh tualchhunga tharchhuah tihpun lama hmasawna chu an hmahlir pawimawh anih thu a sawi.

Chief Minister chuan chhiah lak lai mek tih pun tumna a awmlo tih sawiin Chhiah thar lak tumna a awmlo a ti a, Sawrkarin an dinmun dik tak aia sang GSDP figure an nei thin chu tha anti lo a ti a, Tlahniam ta angin lan phah dawn mahse huaisen taka figure dik thei ang ber hmanga inteh a, nihna dik phochhuah an duh avangin kum 2026-27 GSDP chu cheng vaibelchhe 43817 leh nuai 9 anga chhutun a ti a, kum kal mek atangin cheng vaibelchhe 4290 leh nuai 67 in a pung tih sawiin a punna chu za zela 10.85 ani tih a sawi.

Pu Lalduhoma chuan ZPM sorkar flagship programme (Bana Kaih ruahmanna) atan cheng vaibelchhe 350 dah a ni a ti a, he ta tanga cheng vaibelchhe 150 chu thlai thlan bik leina atan a bik taka dah a ni tih sawiin MLA 40-te'n MLA Local Area Development Fund atana an hman tur cheng vaibelchhe 80 dah a ni tih sawiin kawng siamthatna atan cheng vaibelchhe 183 leh nuai 25 dah ani a ti bawk.

Chief Minister chuan State-ina hna pawimawh bik a kalpuina tur State Priority Project atan cheng vaibelchhe 100 dah a ni a ti a, Mizoram Universal Healthcare Scheme (MUHCS) bill pekna turin cheng vaibelchhe 130 an dah tih sawiin Social Welfare hnuai Ruihlo ngaite enkawlina Home chhawmdawl nan cheng vaibelchhe 70 dah a ni a ti bawk.

Pu Lalduhoma chuan Power & Electricity Department hnuai kawlpheh leina atan cheng vaibelchhe 550 dah ani a ti a, ruihlo dona hmalakna Anti Narcotic Activities atan head thar hawngin cheng nuai 40 dah a ni a ti bawk.

Kan corr report lo ngaithla ang.

*Budget a pharh zawhah Chief Minister hian thuthar thuthar lakhawmtute kawmin ZPM kaihrui sorkar hnuah Pension sing 2, sang 9, 598 an chingfel tawh a, Pension chuan Mizoram sorkar budget zaa 14.66 a ei hek pha tih a sawi a. An sorkar hma khan Pension 974 chiah chingfel a nih thu sawiin, kum 2023 December ni 8-a an sorkar tan atangin tun thla February ni 13 thleng khan Pension 4,560 an chingfel tawh a ti a, a vaiin mi sing 2, sang 9, 598 pension an chingfel tawh a ni a ti.*

*Chief Minister chuan a kaihrui sorkar chuan hna chhia an duh loh avangin hna chhia awm tur venna turin tunhmaa Mizoram sorkara la awm ngai lo Project Monitoring Committee (PMC) an din chu Mizoram mipui zawng zawng aiawh zo committe a nih thu sawin, kohhran tin leh political party aiawh an tel kim vek a ti a. PMC chuan Mizoram sorkar hnuai hnathawh zawng zawng an endik tih sawiin, thuthar lakhawmtute chu hna chhia endik ngai an hriat chuan Mizoram sorkar hnenah thlen thin turin a chah, a hmuna endik turin PMC an tir zel dawn tih a sawi a ni.*

**(Desk/Maremi)**

&lt;&gt;&lt;&gt;&lt;&gt;

## OPPSN REACTION

Kum 2026-27 Mizoram sum ruahman cheng vaibelchhe 17,076 leh nuai 92 chu Assembly House a Chief Minister in a pharh hnuah political party te chuan an zirchian tur thu an sawi.

Congress MLA Pu C Ngunlianchunga chuan kum 2026-27 budget chu engzat pawh ni se, dik leh tha taka hman ni thei se a hlu ber tih Akashvani Aizawl a hrilh a ni.  
Kan corr report lo ngaithla ang.

*Lawngtlai West bialtu Pu C Ngunlianchunga kan kawmnaah vawiina Finance Minister-in a pharh tak kum 2026-27 budget chu a bu an la zirchian hman loh avangin a tha dawn nge dawn lo tih an la hriat loh thu a sawi a, hetihruah hian budget a*

*sum dah zat chu engzat pawh ni se, a tam emaw a tlem emaw a tlem dik se a hlu ber a ti a, budget chu a pung a nih chuan a lawmawm a, a pung lo a nih pawhin Pathian thu ah a ngai tih sawiin, dik leh tha taka hman ni thei se a that ber a rin thu a sawi a ni.*

*Leader of Opposition Pu Lalchandama Ralte chuan budget chu an la zirchian hman loh avangin sawi theih a la nei rih lo tih a sawi bawk a ni.*

Corr: Maremi

<><><>

FCI

Food Corporation of India FCI Mizoram State Consultative Chairman Pu K. Vanlalvena'n Mizoram sorkar in mipuite hmena buhfai a sem tur buhfai FCI ami vek ni thei se a tih thu a sawi.

Pu K Vanlalvena chuan nimin khan Aizawl Press Club ah thuthar thehdarhtute kawmin Pu K Vanlalvena chuan thlatin a Mizoram sorkar in FCI buhfai a demand zat chu quintal singnga sangli zasarih sawmkua a ni a, free market atanga a lei leh FCI atanga a lei niin FCI ah hian Mizoram mipui tla tur zat dil belh se an chah sak thei reng a ni a, FCI buhfai chu certified niin a that mai bakah a hrisek zawk a ni a ti a. FCI buhfai rate hi open market aia a tlawm zawk avang leh a that zawk avangin sawrkar chuan lak belh se, sawrkar sum thahnem tak a humhim thei dawn bawk a ni a ti.

Mizoram ina FCI Buhfai an lakna hmun chu Punjab, Haryana leh Chhattisgarh a ni a, bairabi rail head ah a lo thleng thin a, tunah chuan Sairang alo thlen theihna turin Central Railway Ministry ah an thlen tawh thu sawiin hei hian district dang te tan buhfai phurhna hmun a tih hnaï viau tawh tur thu Pu Vanlalvena chuan a sawi a ni.

FCI hnuai Mizoram in beneficiaries a neih zat chu nuai 7 & 4573 an ni a, Ration Card Holder nuai 1 sing 7 & 6143 an ni a, Fair Price Shop hi Rural ah 942, urban ah -316 awmin, Godown hi hmun rukah an nei a- Bairabi, Kolasib, Bualpui, Aizawl, Lunglei Leh Lawngtlai ah te neih ani a, heng a leng a, Sairang ah Mizoram a lian ber tur Godown siam mek niin hetah hian buhfai MT 1000leng thei tura duan a ni.

**(Hruaia Aizawl PTC)**

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Vawin chawhnu dar 2 leh a chanve-ah Chanchintha puan leh a ni ang.

<><><>

MAMIT-SAMPOORNATA ABHIYAN

Mamit-a Sampoonata Abhiyan 2.0 hmalakna kal zel thlir hona Niti Aayog official te nen nimin khan Mamit DC Conference Hall-ah neih a ni a,

Niti Aayog Dy Director Pi Swapnalee Bhattacharya leh Niti Aayog Young Professional Pu Ngayaipam A. Shimray-a ten enpuin Sampoonata Abhiyan 2.0 hi kumin April ni 14 thlenga kalpui tur a ni a, hmalak tawhna leh hmalak tum dan te sawi ho a ni. Zawhna leh chhanna hun hman niin line department te chuan an harsatna leh mamawh te Niti Aayog hotute hnenah an thlen.

Sampoonata Abhiyan 2.0 hi ramchhunga Aspirational district leh Aspirational block-ah te hman a ni a, Mamit District leh Reiek Block-ah kalpui a ni.

Pi Swapnalee chuan Mamit district hmalakna chu fakawm tiin a aia nasaa tan la turin a chah a, department dangte nena thawkho tha turin a ngen bawk. Niti Aayog hotute hian Primary school V, District Veterinary Hospital, Anganwadi centre te an tlawh a, hotute nen inkawmna hun hmangin an harsatna te an sawi ho a ni.

**(RD Darthanzauva Mamit PTC)**

<><><>

LUNGLEILEAP

Lunglei District Bawhsap hma laknaa Lunglei District-a vohbikte chawi kannu tur ruahmanna – Project LEAP (Lunglei's Empowerment for Access and Equity for all Persons) hnuai nimin khan Lungsen RD Block chhunga Putlungasih khuaah vohbikte hrisekna dinhmun endikna, health assessment camp buatsaih a ni.

Health & Family Welfare Department Lunglei atangin Sr Specialist (Orthopedician) Dr Joseph Lalrindika Chawngthu hovin Audiologist, Clinical Psychologist leh Ophthalmic Assistant te, NCD Medical Team te, Social Welfare-a thawktute leh Lungsen BDO staff-te'n Putlungasih hian kal chilhin, camp pantute hi an endik a. Lungsen Block chhunga Putlungasih, Bolia, Zawlpui, Tuisenchhuah, Belthei leh Kauchhuah khua atangin vohbik mi 32 inentirin, an dinhmun endik a nih bakah, UDID card nei lote chu card siamsak turin UDID portal-ah thun nghal an ni a. ALIMCO atanga tanpuina hmanraw chi hrang hrang – wheelchair, bengdar, mitdel tiang, zakdawh tiang leh hmanraw dang dilsak turte chhinchhiah nghal an nih bakah, Healthy Lunglei District Campaign hnuai natin inkai chhawn theih loh (non-communicable disease – NCD) leh natna dang endik nghal a ni bawk.

**(Thangmingliana Lunglei PTC)**

<><><>